

# Nov parlament – novas forzas

Sessiun d'enviern a Berna cun cumenzament da la nova legislatura

DA LUCAS DEPLAZES / ANR

■ **Oz, ils 2 da december 2019 cumenza la sessiun d'enviern che dura trais emnas. Il nov parlament sa raduna per la 51avla legislatura. Las elecziuns dals 20 d'october passà han procurà per surprisas.** Avant diesch dis han ils novs e las novas che van oz a Berna reschet las infurmaziuns ed orientaziuns da basa e premdi l'emprim contact cun lur fracziuns. Per ils blers èsi sco ina «nova vita». Pli baud valeva la lescha nunschritta ch'ìls novs hajan da star quiet l'emprim temp, da tadlar e d'emprender.

Gia a l'entschatta da la sesida succeda la saramentaziun. Tar quest act solen sto mintgin e mintgina engirar u empermetter da respectar las leschas e da far tut per il bainstar da noss pajais. Suenter l'examinaziun dals mandats elegian las chombras lur presidis e lur biros. En il cussegl naziunal vegn la vicepresidenta, *Isabelle Moret*, pld/VD, a surpigliar il timun e *Hans Stöckli*, pss/BE, duai presidiar la chombra pitschna. Omaduas chombras vegnan alur a nominar lur commembers per las 11 cumissiuns permanentas e per las cumissiuns legislativas e da surveglianza.

## Pli verd – pli giuven – pli feminin

Tar las ultimas elecziuns en il parlament federal ha quai dà grondas roschadas. Ils verds han gudagnà en il cussegl naziunal 17 sezs dapli, ils verd-liberals nov sezs, sin donn e cust da la sanestra, dals liberals, da la pbd e da la pps. En il cussegl dals chantuns han ils verds ussa quatter sezs dapli, sin donn e cust da la pss e da la pbd. En il parlament federal politiseschan ussa dapli forzas giuvas.



Oz sa raduna il parlament federal en nova cumposiziun per cumenzar la nova legislatura.

MAD

Augmentà marcantamain lur quota han las dunnas. En il cussegl naziunal cumenzan 68 personas la legistalura per l'emprima giada, 29 ston bandunar lur sutgas. Cun 22 novas personas è vegni renovà il cussegl dals chantuns quasi per la

mesadad. Da las 46 sutgas han las dunnas acquistà 12, ina vaira surpraisa.

## Courant normal?

Ils 11 da december elegia l'assemblea federala – quai vul dir las duas chom-

bras che sa radunan en la gronda sala dal cussegl naziunal – ils set commembers/commembras dal cussegl federal. Cun quai che nagin ha demissionà pon ins quintar cun ina reelecziun da tuts set.

Dentant han quellas elecziuns adina puspè procurà per surpraisas. *Simonetta Sommaruga* vegn a presidiar il gremi l'onn proxim.

## Legislatura persa

La 50avla legislatura che va uss a fin pon ins giuditgar sco legislatura persa. Il parlament n'è betg stà bun da schliar ils problems da noss pajais che stattan daditg sin rucca. La dretga n'ha betg vuli far cumpromiss e la sanestra ha fatg pretendiuns ch'han impedì schliaziuns raschunavlas.

Quella politica da bloccada n'ha purtà quasi nagins resultats. La fin finala ha il parlament purschì in cumpromiss per la revisiun da la taglia per las interpresas ed in zutger per l'AVS ch'ha chattà l'acceptanza tar il suveran. Ils problems ils pli delicats ed urgents, numnadamain la revisiun da l'AVS, da las cassas da pensiun, ils gronds problems sin il sector da la sanadad, la dumonda davart nossas relaziuns cun l'Uniun europeica e mesiras per proteger il clima èn anc adina sin maisa.

## Dapli che mo baterlim

Dal nov parlament spetga il pievel finalmain revisiuns e schliaziuns dirigidas vers l'avegnir. Sper tut ils problems sura numnads stattan en il center la cumpra da novs aviuns da combat. Per quest'acquisiziun dumonda il cussegl federal in credit da sis milliardas francs.

Da discutir dattan plinavant diversas iniziativas dal pievel e las expensas da la confederaziun per ils proxims onns. Empe da gronds baterlims èn uss soluziuns dumandadas.